

等目菩薩所問三昧經卷上

一名普賢菩薩定意經

西晉三藏法師竺法護譯

大感動品第一

聞如是一時世尊遊於摩竭境界法靜道場
初始得佛光煒明曜宣真諦藏演如來慧暢

平七

三世要布無罣礙道寶之定佛時以此普智
無極燿然正受其定恬怕忽無形像亦無中
外靜無見聞所居正受乃大曠蕩汪洋無極
難遇難聞億世之過時逮此定佛定無量無
不昂徹以悉通慧得普智力無限清淨頌讚

永樂北藏

等目菩薩所問三昧經

第三二冊

如來以無巢窟陶現佛身得大空寂微妙之
句乃弘無極佛諸感動等無所住而轉慧行
名稱普世光揚如來應時之興為現佛土以
其一相了達無相無相無行亦復無相威炎
巨然照于十方無上佛定震曜如斯盡極諸
土同時現變都世一切莫不雅奇爾時會中
有一菩薩名曰普賢承佛聖旨而自念曰今
日如來所現感變從往古來所未聞覩如是
瑞應必有殊特無盡之要當使他方諸大菩
薩咸共受持即如其像而為正受放大金光

照十方土於光明中散天華香而作天樂其樂柔和同一洪音普賢菩薩告諸族姓子釋迦文佛今日當演未曾有法族姓子等所欲者成尋頃之時菩薩大士如塵之數普悉來會是時世尊以大正受靡不實焉覩於諸衆無不明盡生者終者及其成滅以所正受悉無不達曠定普至無窳不徹察衆來會純悉菩薩皆大童真爲摩訶薩如十方刹土塵埃之數志悉高妙獨步殊特悉在最署封拜無上法身無量而皆具足名流顯稱普至十方

名住要行所住如佛勢力無敵猛喻師子得金剛志慧無罣礙智德純厚重過須彌心喻虛空而不可量攬總持慧而自娛樂曉了諸法本無之界盡得諸佛相好莊嚴皆能分身十方現化悉於極世如佛感動遊步無侶威神獨尊能於十方大師子吼以金剛志陷碎魔怨伏之以慈降順唯德却衆外道進退自由道德正想祐濟一切皆雷法鼓已舉法播震鳴法珂列豎法幢其所遊居莫不信解爾時於是來會菩薩各隨行立字其名曰剛意

菩薩過意菩薩說意菩薩上意菩薩施意菩
薩龍意菩薩果意菩薩調意菩薩力意菩薩
曠意菩薩無限量意菩薩解意菩薩最意菩薩
天意菩薩祠意菩薩處意菩薩事意菩薩尊
意菩薩法意菩薩寂意菩薩德意菩薩一意
菩薩一相菩薩善意菩薩却意菩薩大意菩
薩勢意菩薩人意菩薩佛意菩薩達意菩薩
長意菩薩無思菩薩無邊菩薩嚴志菩薩無
際菩薩嚴本菩薩深界菩薩普便菩薩龍明
菩薩持曜菩薩佛土菩薩心王菩薩一行菩

薩督通菩薩達慧菩薩福行菩薩法熾菩薩
明世菩薩持世菩薩興安菩薩最上菩薩無
上菩薩無比菩薩無等菩薩明光菩薩光耀
菩薩美光菩薩一王菩薩勢業菩薩法雨菩
薩持妙菩薩普嚴菩薩慧明菩薩法首菩薩
慧雲菩薩持地菩薩法王菩薩善達菩薩最
願菩薩行妙菩薩慧藏菩薩意王菩薩修內
意菩薩普智菩薩持過地力菩薩出力勢菩
薩善月菩薩大山頂首菩薩寶山頂菩薩放
光菩薩上場王菩薩無當勢場菩薩無勝威

菩薩大龍首菩薩道首菩薩普調菩薩無退
進菩薩持佛英輪菩薩無惑菩薩威行菩薩
無思意菩薩無量意菩薩佛變菩薩無盡藏
菩薩慧首菩薩法耀菩薩慧茂藏菩薩兩覺
兩菩薩邊現菩薩無愚現菩薩剛通菩薩慧
剛菩薩金剛耀菩薩慧剛意菩薩普目首菩
薩廣目菩薩吉首菩薩如佛威菩薩持佛金
剛菩薩嚴普智菩薩慧莊菩薩普賢慧藏菩
薩如是等十方佛土如虛空等塵菩薩摩訶
薩一切悉與墮樓延菩薩宿共等行修菩薩

德行皆具足爾時等目菩薩承佛威神忽從
座起偏袒右肩右膝著地向佛叉手白世尊
曰欲問如來平等正覺若當聽許乃敢自陳
佛告等目隨若所問恣問如來佛從汝意當
為發遣令汝歡喜於時等目尋白佛言云何
世尊菩薩為以幾無思議之定得應普賢菩
薩之行而致與等勇世誓願及其所修莊嚴
定行於定自在而以娛樂以其定力感動諸
定惟願如來解說議歸於是世尊告等目曰
善哉善哉等目菩薩乃為去來現在諸佛善

薩廣其道場宣暢要議而質是問耳若是等
目普賢菩薩今在此會得無思議菩薩感動
為修無量菩薩之行得無思議菩薩變化已
淨菩薩難值之願致無退還菩薩生行修諸
無量廣德淨行等越無量辯才無礙以大悲
於諸無厭以諸願於際無擾咸當共請此彼
當說諸定正受卓變之行於時衆會聞彼正
士所入名稱皆興恭敬並有瞻望欲見普賢
菩薩而不覩之不聞言音及坐處所所以者
何如來威神普賢菩薩力之所致爾時等目

菩薩前白佛言普賢菩薩今所遊在佛告之
曰普賢菩薩在斯會場吾膝左右遊居不動
時等目菩薩及與大衆以其神力悉觀察之
不知所在重白佛言吾等不覩普賢菩薩及
其坐處世尊告曰如是族姓子汝等不見普
賢菩薩身及坐處所以者何其普賢菩薩處
深行故不可得以其慧行住無礙得如師子
強猛之故得佛無上感變寂無礙際住佛十
力法界首藏致佛威神嚴無毀慧於三世等
諸佛法身普賢菩薩淨一心界時等目菩薩

於如來所聞普賢菩薩德行修菩薩十定皆
願見普賢菩薩思僥推求等目菩薩及一切
衆都不見普賢菩薩時等目菩薩從定寤起
而白佛言吾以十無數千三昧而正受亦不
見普賢菩薩身口意行及其處所亦復不覩
所住遊行之地佛告等目如是如是汝等不
見普賢菩薩所以者何已學菩薩行無盡地
又是等目其於明慧幻化字說寧可分別慧
幻色不曰不可世尊其幻化不可處別況其
普賢菩薩身口意行見可入處所以者何以

其深邃無思議德備之故亦以無量敷演無
盡故解達金剛之慧取要言之曉了無量諸
法性界於諸刹土而無所著於一切身解無
體行無所入無所有法等吾我神足境界而
無毀壞諸住際者而無著現以神通解本無
諸族姓子欲見普賢菩薩者彼無蔽礙聞亦
無礙禮敬無礙心敬無礙意念無礙趣向無
礙覩見無礙修入無礙求索無礙普賢菩薩
志願彼無縛礙時等目菩薩及諸菩薩衆咸
悌樂欲見普賢菩薩並共叉手向頂作是言

曰自歸諸佛自歸普賢三稱如是於是世尊告等目曰當察此菩薩大會吾告勅汝汝當請普賢菩薩都向諸方以其明目正在身中以求索普賢以諸法本而定正受解法無欲當以一心向普賢菩薩當解本無之際身之吾我使立諸土分別諸根普使所至求致普賢行是行者乃見普賢時等目菩薩及會大眾從世尊聞即以頭面為禮咸請普賢其請之頃普賢菩薩與為感動使其大眾咸見普賢於世尊足左右坐大蓮華上其此聚會一

切菩薩出現其身中於諸國土莫不見者其去來普土諸佛展轉相見諸佛之音暢三世慧爾時等目及菩薩眾見是變化咸悅歡喜率禮普賢爾時以佛威神亦普賢菩薩宿德所致天雨眾華紛紛而降諸天瓔珞筵篔簹樂器相和而鳴天雨澤香徧諸佛界於虛空中六有天鸞音諸三惡趣一時休息無量未脫菩薩之眾登時悉解普賢菩薩諸德之行爾時等目而白佛言此普賢菩薩之德為無有量不可限行為無稱限之行為無斷行為無轉

行普流之行爲無所不周至爲無迴還之行
 分別諸法行明無分別隨一切方便之行等
 過口行世尊告曰如是等目如爾之言普賢
 菩薩以淨無數衆生無極清淨無量功德興
 無數福修無數相德備無限行無等倫名流
 無外無得之行普益三世有佛名譽普而流
 著普賢菩薩行績若斯

說行定品第二

爾時佛告普賢菩薩當爲發遣等目菩薩所
 欲并諸菩薩暢諸菩薩場當說菩薩摩訶薩

十定方便普賢菩薩本行功德咸修當行何
 三千一曰得初始大德之明菩薩摩訶薩方
 便之善二名悅向大定之行得菩薩摩訶薩
 方便之行三名明度諸刹之清淨四名修內
 性之清淨五名過去率七臟之清淨六名照明慧
 臟七品諸佛率七慧音清淨之聲徹諸佛土八名
 分別一切衆生身行法界而得自在九名得
 無著曠蕩之行十名得致菩薩摩訶薩大行
 方便此爲菩薩摩訶薩十大定此爲去來現
 在諸佛所說已說今說當說其諸菩薩能行

十定心入是者此名為覺此名為正覺此謂
如來為持十力此名為導師名為大御名為
普智名為顯現名無盡行名無限行名最法
導其得是三昧為普現諸佛國於諸國土遊
樂自在彼則督住衆生之界為達衆生所入
為致無疑之臟為入法界要行為覺明無量
法界為達去來現在諸如來行為見諸如來
法為述解達諸言說利偶為得音聲字句之
行為具足菩薩清淨之行為得住菩薩諸願
之行彼於三世明一時行了一切無二之行

能說諸佛法以方便行轉諸法輪而不迴還
悉覺去來現在諸佛之要行以一佛之覺寤
說諸佛之要此則諸菩薩法要彼覺此慧明
了普智無勝踰者為具足普賢之行為明利
菩薩諸定慧行得諸總持分別三世得觀去
來現在諸佛成立一切於普智之慧此則菩
薩諸土清淨此則得觀諸佛行處菩薩得是
法要者於菩薩法界而有強力以此十定暢
無邊功德如虛空為無限之邊際明照無量
為世法王普於衆生得無量慧廣分十力明

暢閑居修靜之心普入於寂靜之行以大慈
 如師子為慧丈夫為顯法炬諸德之名而無
 斷盡普世聲聞緣覺而無思議通達法界已
 住法積曉種種說權方便行明達一切諸音
 聲說得持無像解像方便得淨所生則淨佛
 種分別法等則與慧等曉解法施入常方便
 暢有順實普化慧道明淨內性能普受眾行
 興諸道場慧悟覺道於菩薩處而無限盡普
 能示現諸大變化明普智行覺悟方便此謂
 普賢之說是為菩薩十定廣普之行分別之

說此謂菩薩之要行於是等目菩薩從佛聞
 知當應請其彼菩薩咸樂等目菩薩所興告
 諸菩薩眾是族姓子等有十正受為應菩薩
 無餘之法何謂十興於佛法以順慧行化度
 眾生順入慧行明諸國土了聲慧行惟法界
 慧受菩薩方便慧行入不退轉菩薩之慧為
 諸眾生觀法慧便制持心力方便之慧廣入
 菩薩心行之慧諸佛並智法興願之慧是族
 姓子此謂菩薩摩訶薩十無餘蕩盡之法又
 族姓子復有菩薩摩訶薩十法興無量心慧

何謂十謂為明解衆生境界度諸興起自了
心起謂遇諸佛興無數心奉諸佛德興心衆
養謂觀諸佛而有無量目所見者興無量心
謂遇諸佛所入音聲而受度之顯無數心謂
諸佛之限分別過其方便之慧是謂賢聖興
無數心謂如來道入無著之力為興無數心
謂普智力當行微妙興致佛法以善分布興
無量心曠蕩之行謂佛境界而無有量普入
之行為興無數明心之行謂佛辯才內性所
願皆獲而致求諸佛法興無數心謂如來會

場普而入現諸身處興無數心是族姓子菩
薩大士興十無數心又族姓子菩薩大士復
有十德入定意慧何謂為十一者在東正受
忽南起悟二者處南正受在東覺悟三者東
北正受西南而悟四者西南正定東北為悟
五者在南慧定忽北現悟六者於北現定出
南而覺七者西北入定東南現悟八者東南
而定西北覺悟九者居下正受忽上方悟十
者上方正受下方亘悟是族姓子菩薩大士
入十定意分別之慧又族姓子菩薩大士有

十大定方便之慧何謂爲十是族姓子菩薩
大士現三千大千之土在一蓮華之上自見
己身在其華上結加趺坐於三千大千而現
其身於三千大千而現其明於一一方而立
其身以一一之身入三千大千之土於諸刹
土一一四天下現億百千菩薩於一一菩薩
行現億億順度之化於一一所化復現億億
分別具滿諸根於一一分別諸根而得具滿
億千菩薩皆是不退轉法者不爲一身亦不
多身亦不入正受亦不覺悟譬如族姓子阿

頊倫王其本身長七百由延神力現身六十
八百千由延立于大海出現半身頭與須彌
山爲齊所現化身六十八百千由延於其本
體不有毀滅如本王體四大之身亦無疑惑
又於大體想若他身於本身者不想終沒以
所王身憎然一常^{平七}以化爲樂化爲曠力以尊
能化所現不疑亦復無惑彼阿須倫懷有貪
婬瞋恚愚癡垢毒諸穢興邪貢高處于大海
止有宮殿由能興立化身如是況其菩薩大
士之等曉了幻化諸法要者明解觀世皆如

夢耳知諸佛興明達普世悉了了之亦如化
矣解諸音聲皆如響耳觀於諸法而順度之
又如法身本之清淨曉入諸法亦復如是明
了身心曠無所有解無數身所入之處皆發
為佛行道清淨其得住于斯大定者豈應有
疑況當惑哉何得聞耶其行如是致大定場
觀世現身身入普世如彼水神立于本身因
所受體變化大身譬如族姓子比丘觀身內
外不淨亦觀色識悉皆如之則勤修行菩薩
大士亦復如是以觀法身而建顯行其所入

者彼悉觀世亦現世法於其世法淨無所著
此則菩薩感動境界由斯大士得正定故是
族姓子菩薩大士入于普世世所不動也

神變品第三

又族姓子菩薩大士現三千大千土其數如
塵半七一一塵土入而現身于一十一身現明普照
於一一明現衆色像復一一相現有宣暢一
一宣暢現化衆生而於彼此菩薩悉知諸土
所有解土欲著明土清淨曉入諸土知土所
處了土住止明曉諸土知諸土行如其菩薩

入土如之如其土菩薩入如之不以相土而
現所生不以法本有所毀土譬如族姓子日
欲出時日光先照於七寶山其七寶山遶須
彌山者明復次徹七山之間日炎轉燿山之
金精其明展轉相晃昱昱夫日行照從次悉
明日之宮殿普徧明曷又日宮殿弗有其限
亦無所礙不念所照亦無所照又其日光不
著于山亦不離山其日明者不在虛空不離
虛空如是族姓子菩薩大士以此之明人普
等住於大定者斯須一時一日一夜半月一

月一歲百歲及劫興衰有著無著廣狹麤細
喜有佛世及菩薩衆有遇佛時一切所止佛
土清淨諸所住處種種類行普無數衆生死
無量不可思議有去來見無去來見及種種
寶至無量寶種種罪復報應清淨人彼國
土處普念諸土諸所有土極于衆刹人是菩
薩盡悉現之都入了現遊之教之如是族姓
子菩薩大士以住此定於諸土不想所止於
諸法離法本亦不入土亦無所想人彼菩薩
不想刹外不想有土不想無土不壞土想亦

無所毀又彼菩薩於諸法不一想不非想亦不求法亦不毀法法界本無皆悉了之

幻事品第四

譬如族姓子幻名帝網帝界所行其有善學行此幻者明曉術已於四幻道現此帝網大

幻之事普衆咸住共觀視之諸天都聚在于

幸七

十二

一處現一日七日半月一月一歲百歲復現城郭縣邑聚落復現江湖淵海河流諸水現雲興雨作此大變現嚴諸土不以所現與歲月諍毀所現幻化興天歡樂而於幻體亦無

所損諸天見之亦無疑怪是菩薩大士之等以此大定而爲正受於一刹土現無所土有其諸大地水火風如海寶山及須彌山鐵圍山大鐵圍山盡人境界城郭縣邑及諸聚落像天宮殿諸龍宮室衆神所處香神所居水神所遊癩神所之妓神所樂恬神所安又像極世諸所宮殿及欲色界至無色界又小千土中千土三千大千土有罪無福一切衆類轉身生死明達盡之於彼等念入以明慧審見無見於諸刹土不有疲勞棄此刹勞不有

斯疲棄諸土行無土無行所以者何伏入法
故又彼菩薩於諸法入無著法於諸法界不
想有念空無所行於諸刹土不想空行於諸
受身亦無壽行因緣諸法如審諦見亦無命
行於諸起滅化轉以法於化無化菩薩以法
具願入故菩薩行寂諸法靜故菩薩行化不
想化故普度衆生等如來法之清淨故菩薩
法界行無思議法無取故菩薩行悲普悉善
權化衆生故菩薩如是處于一刹明無數刹
所住行處了無數類衆生身行現于無數善

薩修立念于無數佛之興顯受諸如未平等
正覺法要之說於彼自修菩薩行於此寂沒
而彼等現於彼寂沒忽此等現行不毀吾入
于法界明入寂靜憶念于慧以益於冥如彼
幻師住于此地而現幻化不以現幻有損於
地所現幻事依因於地幻不念晝夜不壞時
節菩薩如是以無刹界而入于土以無國土
明了於國又以國土而曉無國以無色處現
住於色不以一而毀於二亦不以二而毀於
一譬如幻名解普法入于法幻明入慧幻

已入慧幻曉入行幻已入行幻而興慧幻而以慧幻了別諸行如彼幻士不於地外而現其幻亦不在衆觀人之外菩薩如是不以虛空入諸國土不以土外而入虛空所以者何土入虛空而無毀故能入國土則入虛空是彼菩薩普嚴莊校以土境界入交諸行等見無見致以無壞修明解了行而觀之一彈指頃遍無數土悉了諸所生於劫過劫所可行者以一時聞於無量劫復過是數過所興積不有惟想此之過劫一彈指頃廣所現作不

以意念樂慧幻故是菩薩學明度無極以過慧幻達入世幻明越法幻與世幻無諍普徧慧行幻極三世而過無數幻過通慧入于心幻過億無限過諸佛幻普度無極菩薩如是解入諸土都土都悉曉了永無所著都亦無念如彼幻士因帝網幻普現諸幻不處于幻亦無所惑菩薩如是得入諸法度無極者不念入法入法不惑是菩薩名廣普大定菩薩樂定品第五

又復諸族姓子等菩薩摩訶薩東方去此過

無數佛刹於彼有土名最上度無極於彼有
 定正受號無上度無極如其所過本土乃得
 最上之土其土或有土而正受或早時或中
 時或復晡時或西時或晚時或念之頃或斯
 須之頃或時節之頃或五夜間或十五日間
 或一月間或復一歲間或百歲間或千歲時
 或千萬歲時或億萬歲時億百千萬歲時或
 億那術百千萬歲時或一劫時或百劫時或
 千劫時或百千劫時或億千那術劫時或無
 數劫時或無量劫時或無邊幅劫或復無限

劫或無盡劫時或無思議劫時或無限如虛
 空劫時或有無限念劫時或有無限量而過
 量劫時而彼菩薩不以法之時故有住而有
 欲想亦不以時節之住而有欲想又彼菩薩
 不以種種之時而起疲勞想亦不於中而起
 想亦無二行亦無吾作亦不有念亦不無念
 亦無想念亦不念坐定亦有起想以一切諸
 法無限量故譬如日天子與諸天而有所照
 導日者行之諸天亦無行止日亦不夜出亦
 不念晝日日已沒乃知耳亦非彼天所知也

永樂北藏

等目菩薩所問三昧經

第三二冊

等目菩薩所問三昧經卷中

率八

西晉三藏法師竺法護譯

大權慧定品第六

又族姓子菩薩摩訶薩於一切衆生之身佛身而等解之彼以此多觀如來於無數國土如微塵數於諸如來一切而供養一切衆華一切極世衆寶以供養一切衆寶供養散其上一切衆飾供養種種經行之處供養以無央數一切摩尼寶起塔精舍而供養所可供養過天之所作所爲供養皆佛之威神一切

佛土清淨種種供養皆佛所念佐接而以此供養佛亦以供養諸佛禮足彼諸如來以盡身之化而復以其恭肅而問諸佛法願說諸佛平等法敷演諸佛大法入諸佛要行行於大悲入於無限順行等力思諸佛入諸衆生要明入本積亦不知佛之興亦不覺諸如來滅譬心之興念亦不知所由起亦不知其所歸菩薩亦不覺如來起亦不覺如來滅譬如於晝日時野馬之河亦不由陰有亦不出於彼泉亦不處於地亦不從東隅來亦不有亦

不無亦不善亦不善亦不清亦不濁亦不可飲亦不可汙亦不有亦不無亦不味亦不可味有形如水之像緣此而興念如野馬之河便有河之想念此去想念而遠於近而無所毀野馬之河亦不可處菩薩亦如是於諸如來之興亦不識如來興亦不識如來滅以相想諸佛有耳以無相而無想是諸族姓子諸菩薩大士名曰清淨之定以此定正受而覺寤而不失其定譬如明了人寢寐於夢中所行知皆無因緣悟已皆識知之菩薩大士

亦如是見諸佛而忘其識持諸佛法知諸如來衆座之場勝致諸佛土清淨解了義理明了分別諸法之要廣顯諸法之因緣顯益佛種行淨諸佛威神廣演諸佛辯才是族姓子諸菩薩大士入定之權慧也

無量如品第七

第八

二

又族姓子菩薩大士行念過去諸佛如來興度無極至劫過劫過諸土盡無極明知諸土盡劫過劫當明知諸佛之興盡劫過劫明了諸佛興敷說經度無極法從劫過劫說法度

無極明知意行度無極明諸情度無極於情
度無極知行種種乃明了種種如來壽命彼
此皆知於諸壽命過歲億那術彼此皆知彼
以此慧而行知無量如來賢行本無無量賢
明知過去諸土本無無量明知過去諸劫本
無無量如過去明知如法本無無量如知過
去心本無無量如知過去脫本無無量如知
過去衆生行本無無量如知過去所說本無
無量如知過去起本無無量如以其定正受
名曰過莊嚴藏以發一心能過百千劫本無

無量以其心過億百千那術劫復過無數劫
復無思議劫復過無稱限劫復無邊劫復無
量劫復過阿僧祇劫復過不可思議劫復過
無量劫無量復過無量劫其因緣而無有滅
過去無所因定正受而立其十法三爲彼定復
有悟亦立其十法八於諸如來得入不思議亦
清淨而起亦無住修立得之督致之受滿奉
持求平等入三場何謂十一者解了本癡之
行二者辯解無盡法三者分別無毀無諍四
者分別無住五者辯才無動六者已所說而

至誠七者爲一切依住八者悅向三界九者爲諸德本之上十者於諸法而無輕慢此族姓子是爲十無限定之行其是十定而悟譬如族姓子身在胞胎當應生者神識已入其此時間菩薩亦如是從定悟以此十而流注於法其時得是族姓子菩薩大士得過去清淨也

權慧清淨品第八

又復族姓子菩薩大士以一一國淨故便入一一土乃已修一一土而現於一一土順持

一一土則住一一佛國土便明一一佛國土已曉了一一土便遊轉一一土則了知一一土清淨於彼諸土於諸當來爲人之上於諸土而諸劫數而有所說於諸劫明了諸像於諸劫而悉分別之於諸劫而順導之於諸劫而念平等於諸劫莫不興發於諸劫而行無量於諸劫香有普美於諸劫而有傷愍於諸劫無有過去諸佛世尊當來所說或無所說有所授決無所授決衆異名號無數名號無量名號無限名號無邊名號阿僧祇名號無

思議名號無際名號無望名號其當興起愍
度衆生現爲法王修行爲導故而當普說三
十七品廣歎諸功德行當廣演說明顯之行
又當清淨其意性行修立當成衆德之行當
廣宣布要上之行又當建立普智之議亦當
過度諸如來行亦當修成具足諸願又亦行
過具足之慧曉了明盡成德之善又過於最
上莊嚴明曉之行立上眷屬亦復曉了具足
於法又復修曉罪福之應又復修觀成相具
足曉了解知具足之善曉了解達平等之德

亦曉了諸佛世尊意亦知其種姓解其權行
亦知方便知其變化及所趣向亦知成佛知
度人物知度無數衆生知諸如來般泥洹知
諸佛時節而其發心頃明了劫事復過百劫
千劫百千劫億劫又過閻浮提如塵數劫復
過四天下如塵數劫過千天下如塵數過大
千如塵數劫過三千大千刹土如塵數劫過
如諸佛國塵數之劫復過如千佛國如塵數
劫復過如百千佛國塵數之劫復過億那術
佛國如塵數之劫復過無數佛國如塵數之

劫復過不可計劫復過無量如塵數之劫復過無邊際如塵數之劫復過無稱限塵數之劫復過阿僧祇塵數之劫復過無思議塵數之劫復過無我限塵數之劫復過無限樂塵數之劫復過樂無樂塵數之劫菩薩以住慧

辛八

五

威神所立二者菩薩為法所住立於世明達十總持已得十總持究竟無盡辯才三者菩薩依行為行所立究竟取願而行具足四者菩薩依德力得立而無能過勝者五者菩薩依慧而立於佛法行無礙故六者菩薩依大悲立轉於法輪以無迴還故七者依彼衆行而立於衆文字諸法之行善修立故八者菩薩依諸所生最上法立開甘露門閉諸惡之門故九者菩薩依慧力立行菩薩行而無斷故十者其菩薩依等力立具足於施力度無

數衆使行清淨菩薩所依無數力故明了無限數劫菩薩得依法力以諸法本清淨故諸所生無數故此謂菩薩摩訶薩第六最大慧定之行其菩薩住是得致曉了無限數劫行明了分別無限數劫權便之行曉了無限數衆生所行權行之相於無限數罪福之行分別已達而得權行復於無限數所行精進現入衆生於行無行之權便於行無行於善惡有無限數之權行於行無行諸法解達權行於行無行於諸時佛興如其像如其說如其

起盡諸佛行解了諸佛種性權行於行無行解說無量慧門迴轉權行於行無行普智感動無數變化如時示現之權行譬如族姓子弟天出時有目之人展轉見諸郡國縣邑聚落亦知高下山川險谷知諸樹木種稷知諸好醜亦知淨不淨世之所有亦知之明目解六達有了意當觀族姓子弟日光之無異而其明照現有目者因其光故普見衆色如是族姓子弟菩薩已達無異之定明曉一切有行無行億百千那術知其種稷明之識之以其明了

以十無惑充滿十方一切衆生何謂十一者
現於衆生不惑得本二者無惑化度於衆生
三者無惑處度衆生四者無惑於衆生所興
行如應如言究竟諸議五者所行無惑於諸
國土而清淨六者諸所入無惑於諸佛土所
行無行於行無行決衆生狐疑七者無惑所
誓願如所請衆生濟度於行而具足諸願八
者無惑權行之法無限礙清淨慧門九者無
惑法說能普法兩罔制諸情於行無行於普
智行使立佛道十者無惑慧之重任無限清

淨慧門之行無惑出現無冥而明照普世菩
薩已住十無惑行法已住是定其菩薩尋從
定起為諸天帝所禮為諸龍帝所敬而雨美
香為諸神帝所見禮奉為諸諒帝所見宗敬
為諸鳳凰帝神所見歸向為諸梵帝稽請為
諸樂神帝所見歎美為怙神帝所見讚歎為
諸香神帝所見追尋為諸人帝所見供養是
族姓子諸菩薩以慧明藏定名為第六興顯
大慧方便行也
興顯品第九

又復族姓子菩薩大士有定名諸佛明顯國
土清淨云何族姓子諸菩薩諸佛明顯國土
清淨定而正受乎於是菩薩入於東方世界
從一國土至一國土於西南北方及四隅上
下方亦從一國土至一國土於彼諸土普現
興佛事於諸如來前現佛感動現佛娛樂現
佛顯尊現佛境界現佛自在現佛師子吼現
佛諸行現佛莊嚴現佛神足現諸佛衆會現
衆會清淨現衆平等現衆如一現衆廣大現
衆所依現衆止處現衆教化現衆如應現衆

雄大現閻浮提衆等會四城亦是千國土
亦如是於二千國亦如是於三千大千國土
亦如是具於億那術百千國土具現衆會之
場於無央數國土現具衆會之場如百千佛
土塵數之國現衆會場舉要言之乃至無數
無量佛土塵數諸國普現衆會之場於彼衆
會之場現諸佛種種所見現諸佛種種身相
現諸佛種種之時現諸佛種種之處現諸佛
種種變化現諸佛種種之感動現諸佛種種
莊嚴現諸佛種種威儀現諸佛種種色像現

諸佛種種事菩薩於彼在在衆會自見而普
周現亦自見於彼而普說經亦自見普持諸
法亦自知有諸法之權亦自知解諸義理亦
自知解達虛空亦自知明了法身亦自知而
無恐怯亦自知不處於有常亦自知不處有
想念亦自知而無勞想亦自知曉了諸慧亦
自知曉諸義亦自知念諸行地亦自知等念
偶義亦自知復無所念亦自知等念諸佛亦
自知等念諸力亦自知等念諸情亦自知等
念空行亦自知等了閑靜以知如是不念于

土不念有人亦不念佛義亦不造法亦不壞
身亦不壞身行亦不意念亦不入心行亦不
念壽命亦不念我人處所譬如以法知法亦
不與有無菩薩行亦無念亦不念遊諸土彼
能現佛無數色像具滿諸行能等行清淨得
致其處能具暢現佛之色相亦現佛所有光
明所現平等而過清淨以昇致之而暢現之
能具現如佛像色具現如佛光明亦現如佛
意像亦現佛身無極相好亦現佛最威神之
明亦現佛最身相之好亦現佛身金剛之色

亦現佛身清淨色像亦現佛身無量色像亦
現佛身大清淨摩尼寶色像亦現如來身如
七仞亦現如來身如八仞亦現如來身如九
仞亦現如來身如十仞亦現如來身如二十
仞亦現如來身如三十仞亦現如來身如四
十仞亦現如來身如五十仞亦現如來身如
六十仞亦現如來身如七十仞亦現如來身
如八十仞亦現如來身如九十仞亦現如來
身如百仞亦現如來身如十里亦現如來身
如半由旬亦現如來身如一由旬亦現如來

身如十由旬亦現如來身如百由旬亦現如
來身如千由旬亦現如來身如一閻浮利亦
現如來身如四天下亦現如來身如千天下
亦現如來身如三千大千天下或復現如來
身如百佛刹或復現如來身如千佛刹或復
現如來身如百千佛刹或復現如來身如億
那術佛刹或復現如來身如無量佛刹或復
現如來身如無限佛刹或復現如來身如阿
僧祇佛刹或復現如來身如無邊佛刹或復
現如來身如無際佛刹或復現如來身如無

思議佛刹或復現如來身如無稱佛刹或復
現如來身如過億思佛刹或復現如來身如
無處所佛刹或復現如來身如無可思議佛
刹或復現如來身如無望過望佛刹如是菩
薩現彼如來身如此無數色無數相現美無
數現無數光無數網明現無數法本無現無
數法本無吾我現諸法本慧所從起現無盡
之身現無行之清淨如是菩薩現彼諸如來
於諸如來身亦無增亦無減譬如虛空而無
疲狀亦無大小於無數土諸土窈冥處不以

寬大其如來身亦如是以其弘大亦無小大
譬如月像照於閻浮提亦無大小其月像住
明無往來其菩薩亦如是得致現如佛住是
定亦不忘懷如是色像所現諸佛亦如夢耳
於此無所見而有見而現諸佛如來音聲所
現諸佛如來音聲於法空無所有耳而皆受
法宣傳此悉在無惑之法譬如衆生死所歸
向而心由是菩薩亦如是於是三昧而住莊
嚴諸土以佛慧度脫而清淨菩薩以十速疾
而應普等何謂十疾滿具足諸願行故疾明

諸土照以佛法疾度衆生法輪權慧故疾淨
諸土隨一切行應故疾成於慧十力等故疾
成平等以諸如來故疾欲降魔以大慈力故
疾欲悅衆生當斷狐疑故疾現感動隨應所
度故疾向法門種種音聲淨諸土故菩薩有
十印以諸法而印彼菩薩何謂十彼菩薩與
過去當來今現在諸佛而行一德本彼菩薩
合爲一身以法身無踰者彼菩薩以一行如
來無二故彼菩薩爲無數場從無二生故彼
菩薩爲無限行與法身等故彼菩薩爲無量

礙於世得十力故彼菩薩行空淨法無二行
故彼菩薩無滿爲世極度故彼菩薩意無內
普智權慧故彼菩薩爲有護以諸佛故是族
姓子菩薩大士有大慧定名曰諸佛音聲普
照國土彼菩薩行此定正受無能爲師者入
諸佛法爲無疑惑故爲極世慧丈夫爲清淨
故心本淨明爲最尊大故爲極世唱導以自
敬重故興最猛健立當來諸佛普智本種故
修慧成信言無二故過去慧無量礙成法藏
故以諸佛法爲興法雨如應衆生行故譬如

族姓子釋提桓因摩尼釋天王所處最尊其
摩尼威明天帝釋以此爲威神其有得此摩
尼寶威尊最大釋天王以十事於忉利而致
尊何謂十以天最色而踰於諸天子以天最
像以天相現天最眷屬以天極欲以天最樂
以天服信以天最自在以天上意以天大智
慧其摩尼寶德適得之者而致天之上尊菩
薩亦如是適得定正受便得廣大無極十慧
何謂十謂於佛刹得無罣礙慧謂於諸衆生
本得起慧行謂依三世得如應慧謂於諸佛

身得所依慧謂諸佛法而得慧行謂一切法
而得一法慧行謂一切極世得入法身慧謂
一切法本得平等慧行謂一切自在得所依
慧謂一切法得致悅慧方得此定以諸佛音
聲於世界而清淨菩薩復有十事而得身威
清淨何謂十謂以無得之得無限之行不處
於土謂以無望之望以種色像於諸國土而
生清淨謂以無怖之怖而放光場爲住度衆
生謂以無想之想而住其身以行興諸佛謂
以無求之求而兩無數華香以供養諸佛謂

以無念之念而設種種音樂之供養諸佛以度衆生謂以無著之著清淨衆事衆飾無數以供養諸佛應如所度而度衆生謂以無行之行而現種種色相得身清淨現以無惑使衆生知之謂以無所有之有而放種種清妙音聲使衆明知種種異語菩薩亦如是得是十分清淨彼菩薩亦具滿處何謂十處衆生導見佛事謂住衆生得信向諸佛謂安衆生以佛法音聲謂度衆生得生於有佛土謂安濟衆生使信諸佛謂導利衆生聞諸佛法音

謂度濟衆生現佛感動謂寧衆生念如其行應而具滿一心謂安順衆生莊嚴諸佛謂利安衆生以發菩薩心故謂永安衆生具滿佛慧故以此族姓子彼菩薩以此十事具安利衆生其菩薩如是以滿十度安衆生已普爲衆生行佛十事何謂十一者謂彼菩薩以音聲爲衆而作佛事以度諸會故二者謂見彼菩薩而興佛事以順導衆生故三者謂彼菩薩方動之頃行佛事用心清淨故四者謂彼菩薩震動諸土而行佛事濟轉三惡道故五

者謂彼菩薩方所現生而行佛事正悅衆生
 意故六者謂彼菩薩諸所行宜而作佛事導
 利衆生使意無惑故七者謂彼菩薩放勝光
 明而行佛事秉持度無數衆生故八者謂彼
 菩薩現修衆德而行佛事勸立衆生無數諸
 德故九者謂彼菩薩至成平等覺而行佛事
 使諸衆生解一切法如幻故十者謂彼菩薩
 轉其法輪而行佛事爲普世說法興賢寶久
 住故是族姓子彼菩薩大士行佛十事以度
 無數人濟無數衆生成滿無量願安立一切

衆意行永立佛事也

外身現化品第十

又復族姓子菩薩大士有定正受名身無毀
 使其菩薩得住此意而身無毀得滿十無望
 何謂十一者謂於諸土而無望二者普於諸
 方而無望三者於諸想念而無望四者於諸
 衆生而無望五者於諸法而無望六者於諸
 菩薩行亦無望七者於諸菩薩所願亦無望
 八者於諸定而無望九者於諸像而無望十
 者於諸行地而亦無望是爲十菩薩得致十

無望便得住一切身無毀行之定云何菩薩
 得致衆生身無毀定是族姓子菩薩於內身
 正受於外身而覺悟於外身而正受於內身
 而覺悟以一身而正受以多身而覺悟以多
 身而正受以一身而覺悟以人身而正受以
 鬼神身而覺悟以鬼神身而正受以龍身而
 覺悟以龍身而正受以質諒神身而覺悟以
 質諒神身而正受以天身而覺悟或以天身
 而正受以梵身而覺悟或以梵身而正受於
 欲界而覺悟或於欲界而正受於色界而覺

悟或於色界而正受於無色界而覺悟或於
 無色界而正受現於地獄而覺悟或於地獄
 而正受現於餓鬼而覺悟或於餓鬼而正受
 現畜生而覺悟或於靜而正受於衆普而覺
 悟或於千身而正受於無身而覺悟或於有
 身而正受於無數身而覺悟或於無數億那
 術身而正受現於空身而覺悟或於閻浮利
 而正受於瞿耶匿而覺悟或於瞿耶匿而正
 受於鬱單越而覺悟或於鬱單越而正受於
 弗于逮而覺悟或於弗于逮而正受於三天

率八

十四

下而覺悟或於三天下而正受普於四天下而覺悟或於四天下而正受普於三處衆生而覺悟普於海之境界而正受亦盡於海之境界與衆生而覺悟或於須彌山上而正受亦復於山下而覺悟或於須彌山下而正受亦復於山上而覺悟或於七寶山間而正受亦復於山上而覺悟或於種種類而正受亦復於種種雜類而覺悟或於清淨種種華香衆寶莊嚴之間而正受亦復現於清淨種種香華衆寶之間而覺悟盡於四天下之境界

與諸衆生隨其心意而正受復現於四天下之境界與諸衆生隨其心意而覺悟於千國土盡其境界而正受亦復現於千國土而覺悟於三千大千國土盡其境界而正受亦復現於三千大千國土而覺悟於億那術百千刹土中而正受亦復現於億那術百千刹土而覺悟於無數刹土而正受亦復現於無數刹土而覺悟於阿僧祇刹土而正受亦復現於阿僧祇刹土而覺悟於無量之量無限之無限佛刹土而正受取要言之如是等刹土普

半八

十五

於其中而現覺悟從一天下如塵數至四天下復千天下復至三千大千天下復至億那術刹土復至阿僧祇刹土乃至無限無數復過無限無數之刹土如是之數普於其中而正受亦於其中而覺悟於一塵中而正受復現於如此上刹土塵中而覺悟從如此上刹土塵而正受復現一塵而覺悟於一聲聞中而正受復現無數聲聞而覺悟於一辟支佛中而正受復現無數辟支佛而覺悟於己身中而正受復現於無數佛身中而覺悟於無

數佛身中而正受復現於己身中而覺悟於一心念之頃而正受現於億劫而覺悟於億劫之中而正受現如心起念頃而覺悟或時覺悟或時正受或同時正受而覺悟或於本跡而正受現於末跡而覺悟或於末跡而正受現於本跡而覺悟或於現跡而正受復於現跡而覺悟於本跡而正受於三世而覺悟於時跡而覺悟於時跡而正受於三世而正受於本無而覺悟或於本無見正受復於本無而忽覺譬如族姓子有人爲鬼神所見媿

時已為鬼神所得自在取參動亦不得自在
唯從其鬼神耳便為隨之於他身也已身不
復得自在菩薩亦如是以得是定或內正受
外而覺悟於外正受內而覺悟譬如死人其
屍為他神所役而其事為他所追逐其所廻
轉皆化耳其役之者是他神力如是族姓子
以得此定而是菩薩而興正受以分別而正
受復以分別而悟以平等分別而正受以平
等分別而悟譬如心自在魔變化自由或化
為一或復為多或化為多或復為一不以一

身而終亡而現其多亦不以多身而終亡而
化現一身於時其一身亦不有一身不以知
一而現多不以現多而知一若一若多從一
而興耳菩薩亦如是於一身而正受多身而
覺悟或多身而正受以一身而覺悟譬如一
類之地地而一味於其一地而諸聚落縣邑
所種各異味味不同地亦不想是味亦無種
種識菩薩亦如是得此定意以一而正受而
多覺悟於多正受而一覺悟是族姓子菩薩
大士名曰分別一切諸身第八菩薩之定其

菩薩得所住宅處致十名譽法名譽常流何
謂十一者為如來所稱歎二者得如來平等
威三者謂為佛明曉諸法而無罣礙四者謂
為最專用諸極世所供養故五者謂為普知
用明曉一切諸法故六者謂為導師用一切
極世所依憑故七者謂為唱導用曉了明入
諸法故八者謂無上師衆生法本普智無故
九者謂為興明用順慧一切極世施大明故
十者謂為十力得致最吉諸所作行故分別
諸法以其慧達念具足無著之行謂為普現

於正法輪得自在以此十名譽之法菩薩以
此有最名聞菩薩復有十明顯而甚威曜何
謂十一者謂諸佛而等其明二者謂於其極
世以法本明說興造慧曜顯振諸法三者於
諸衆生以明照曜種種明說四者以無數明
進道以法場之明五者以法界之明興顯振
說六者以感動諸法而不壞其明七者諸法
無欲等以其無所作而不壞明故八者衆生
無欲等念世一切感動無罣礙故九者諸佛
所立而無斷絕善明照故十者諸佛之境界

而度無極諸法本無明極世一切無所壞故
菩薩以此十門而得光曜也菩薩復有十事
於無所著句說覺而明了何謂十一者善修
調柔於身行二者無羸口行三者柔軟心性
四者處無所住五者諸情無作六者諸行無
所作七者於法無所毀八者慧無所起九者
於法無覺十者順彼以慧是謂菩薩大士降
魔之定以衆行伏之以一爲多正受而悟無
行行而於行而行於已尊大與佛等六以小
而廣泰以曠湯而狹小所趣亦無所至所至

亦無所趣以無身為身於有身而身以覺悟
而正受以正受而覺悟於見無見於無見而
有見是謂十也復有十事而爲變化何謂十
一者謂一切變化境界是皆定意譬如大神
呪言之通告現種種諸色明達無過者所
現喻絕於呪之言而隨足於呪而猛健慧了
時節於幻名顯行學知術慧而通達菩薩亦
如是以平等正受現以無等而覺悟以無等
而正受以平等而覺悟譬如天與阿須倫共
闔天而得勝阿須倫而不如質諒帝以七百

由旬之身與四種之兵而自圍遶阿須倫乃更自化身為百千由旬切利諸天皆共見之其衆嚴整又阿須倫學幻明了菩薩大士亦如是悉明於慧幻行而慧無盡彼菩薩者乃為菩薩耳彼慧幻菩薩以無毀斷而正受於毀而悟譬如大呪名曰妖惑以此呪言取諸種物散種於地便隨得莖枝葉華果實而食之菩薩亦如是得致專一之定能現種種而覺悟譬如男女之會同久久畢致懷妊以成就胞胎而滿十月便生完具菩薩亦如是

長養普智之胞胎具足成滿諸願以廣大內性得致慧明而處無毀定普悟於諸趣在諸趣而正受於無毀定而覺悟譬如龍宮殿依因於地亦現於虛空亦不動虛空亦不驚諸龍虛空亦有乾陀羅亦有諸龍其虛空而無增減或欲晴陰於虛空而無動而其宮殿續平八依於地或依虛空菩薩亦如是以得是如幻定於有相而正受於無相而覺悟於無相而正受於有相而覺悟譬如梵天之宮號持世清淨藏最上梵所處之宮或現千天下或現十九

十千天下或現百千天下或現三千大千天下或現於天龍神乾陀羅阿須倫迦留羅真陀羅摩休勒諸人鬼神宮及世人間或現須彌及七寶山間鐵圍山寶山黑山雪山及四天下郡國縣邑聚落君王人間梵所之至無所不徧譬如明鏡見其面像菩薩如是處於此定於諸一切慧無不明徹也靡所不入而悉平等一切普徃慧照明徹彼菩薩亦如是以此分別一切身定國土自在之明悉見佛種而化一切諸種而過法種具滿解脫行種

亦以定種而感動起悟之種而普現以得慧種以住智種菩薩於十感動而致度無極何謂十一者謂成佛感動若如虛空二者盡於法際三者以菩薩感動至於無毀於毀自在而度無極四者菩薩之行六願感動五者行入如來行佛事度無極六者於諸土感動現一切種種閑居之行七者動搖一切諸土依於明顯八者感動一切衆生以無思議行悉了幻事感動以慧九者感動分別諸定十者以金剛定以幻化正受覺悟以慧菩薩以此

十定之行具滿諸種也又復族姓子菩薩能
 化為佛能住如佛能化法輪建立應化普現
 如來之光明度志大乘於彼而降化於心尊
 大神足感動而度無極於菩薩中而尊大明
 了菩薩無著慧定以無得之得億百千以諸
 法門感動而轉法輪菩薩無罣礙二十明知一切
 行皆曉習智無想念以其明慧一時悉能曉
 了現感動三世亦無罣礙以此十事而大感
 動諸佛菩薩所行而致度無極是族姓子菩
 薩大士分別身行所可依住而致大德權定

之慧達也

等目菩薩所問三昧經卷中

音釋

督冬毒切胞胎胞匹交切胎衣也胎土來
 稷子力切百刃而振切八
 穀總名也尺曰刃

永樂北藏

等目菩薩所問三昧經

第三二冊

等目菩薩所問三昧經卷下

率九

西晉三藏法師竺法護譯

分別身行大慧空品第十一

又復族姓子菩薩大士於己身盡其身等如
幻眼之所見隨於法界菩薩之定與亦等於
身諸毛孔一一之毛現諸法界而菩薩居之
正受彼亦住於幻法耳及所知諸國土亦知
彼法俗以知諸法便知億那術無數國土復
知無得之得佛刹塵數之國土於彼諸國土
等現有佛菩薩圓遶而皆具足淨復清淨皆

悉勇猛賢行辯才而大莊嚴無量覺飾如日
明曜衆寶嚴好於彼若十劫若百若干若百
千若億若億千那術若無數無限無邊無際
極盡無盡之數至如佛刹塵劫之數行菩薩
諸行所依住者而不可盡極菩薩於彼作是
定正受而復覺悟於此而正受於彼定而覺
悟彼普入諸國土於彼而化衆化衆生界皆
使悉入法界而曉了過去諸慧而復現處說
於經法明曉無具無罣礙眼所分別於法而
自在卓然而過耳所分別致度無極鼻所分

別亦復以權口所分別悉之明了身所分別亦具曉解心所分別慧念滿具彼以此慧作是明了便得十億千總持何謂十以法普順諸土得成十億千清淨之行解了十億千神諸情入普智行得具滿十億千神通得入十億千定意行得十億千神足而致具滿得致增益十億千力得具滿十億千誠性得顯現十億千所依住處得致十億感動是為十菩薩復有十體以致成就億千菩薩有十行處具滿億千菩薩有十藏以過平等億千菩薩

有十行於億千而顯光曜菩薩有十住以億千之教說菩薩有十願而過億德善之行菩薩有十悔過誠立億千修德之行菩薩有十明顯得致億千清淨之行菩薩有十向勝致億千以自明顯菩薩有十說以得億千照明之德菩薩有十清淨果達億千而致清淨是謂菩薩大士行具無數身成就無數德滿無吾我德成致無數行修無思議德行無稱限德滿無我行致無德之獲無盡念無我德行菩薩以此行而具足諸德得致平等行而

自莊嚴得致顯豫調和柔弱得致奉持得致
供養而為殊增得無踰者得為勇悍菩薩於
是法得自在菩薩依是定於東方乃十佛刹
無數千塵數如來所建立以一一名字一一
名字彼十佛刹如塵之等無能念限者從彼
一塵分為佛刹無數千如塵數以徧其中亦
無覺知而無增減如一之不覺而無增減普
於諸刹如塵數亦如是如東之所為南西北
隅上下亦如是其一塵分破之所可著處其
數亦如上其菩薩能建立之普能現其身是

彼菩薩於諸佛刹普能清淨所建置也以如
來身無限故又於光明而得自在復以無思
議故得有感動使普現耳如來耳之所宣亦
復無量如來鼻之分別亦無限礙如來口所
分別而現平等如來身於細滑而順行之如
來心所現而不可限如來正覺所知念亦無
限量宣如來音聲清淨普顯現如來法輪而
無迴還使一切普知如來聖眾而無限數如
來法覺而亦無限而普順導普現興顯如來
功德之本現入如來之定如來之德於三世

修行而無數如來現興顯諸法如來所建立
宣音聲說是爲十現建立如來之土以佛音
聲而普雨諸法使其音聲普聞諸土廣宣傳
佛之正受亦復普宣諸佛世尊賢聖之衆建
立諸佛無思議法所宣諸法悉如幻化宣演
諸法而無所著悉明顯一切法場普悉暢現
如來衆德之行是爲十一切諸定順導如幻
建立心如幻解無罣礙菩薩於此法界而悉
自在乃爲建立菩薩耳彼諸佛世尊於諸種
種心意以一一名字而現無數佛土無數千

如塵數諸如來以一一名字如塵之數以一
一之塵立置如十佛刹至九數如塵數佛刹
亦無增減無能知所取著之者是菩薩所建
立也修應無遍數行亦心所建立以無著行
意所建立於諸法而無惑故念所建立於諸
法慧分別故行所建立諸法所受處故行所
建立順奉諸法故亦覺道所建立修行普宣
傳法故亦建立無數諸情以達神通分別於
法用權慧故爲無起行所建立明了法界無
所著故亦住修入慧行無限慧清淨故亦住

於等正覺普於諸國土而現感動故菩薩以此而住諸定故得充十海之門何謂為十一者謂現充佛海順導諸海故二者以過法海行了慧海故三者住諸明曜於情無所著故四者以慧感動用敷音聲故五者念諸情之海順以權慧故六者曉了心海一切無種種之觀而知無數心故七者滿於行海具足願故八者具滿一切行願海故諸藏此事對十者成致一切於覺道故是為十菩薩成滿一切道德之海也菩薩有十事得致上尊何謂十

一者以上尊順導一切二者求於最上化導衆生三者求向上尊則達諸梵行四者致最上力求具得之五者求無倫侶於一切極世六者求無過踰勝魔故七者求以明暢度一切惡道故八者求無所依於諸所生九者為尊於諸佛法十者求為自在於諸衆生將有勇健是為菩薩最上十尊法也菩薩復有十事興起於衆生之界何謂為十一者常志出家欲度衆生故二者無其迴轉進最猛力故三者求依諸佛受行行故四者有無限力進

諸法故五者寂定之力於諸法自在故六者
 心無迴還順導力故七者於義自在本無法
 力故八者為大智慧宣法無礙力故九者
 勇猛力法所建立故十者分別力宣布無量
 慧故是謂十種之力而復致十大勇力何謂
 十一者最健之力二者無過踰之力三者無
 量之力四者善修之力五者無動之力六者
 無起之力七者無怒之力八者慧常之力九
 者勤建之力十者弘慈之力是為十力復有
 十力何謂十一者修調行力二者慧清淨力

三者過清淨法力四者法身之力五者諸法
 土力六者法明曜力七者法情之力八者無
 所壞力九者善修行力十者修勤入力是為
 十大力復有十力何謂十一者大丈夫力二
 者正雄勇力三者等正覺所建力四者前世
 所修德本之力五者無量德本如應之力六
 者如來之力七者普應入力八者於三世等
 力九者得菩薩如地行力十者德菩薩信向
 清淨行力是為十力復有十力何謂十力一
 者菩薩離轉力二者菩薩順緣之力三者菩

薩於性得自在力四者菩薩修於內性清淨力五者菩薩修諸德本從諸行力六者菩薩行法最力七者身無著力八者菩薩以是致成之力九者菩薩入權慧力十者菩薩諸法本清淨信向之力是為十復有十事何謂十

一者住於普世清閑無處力故二者於諸眾無雙力故三者普於一切無等力故四者以諸德行化眾生力故五者在於生死無傾動力故六者度諸生死清淨如蓮華力故七者普現諸導降諸魔力故八者將順魔黨大乘力故九者化於三界無所處力故十者普勸進十方無礙力故是為十菩薩以此無數之法成其德化也又菩薩興起滿眾願行明曜之顯照之而普應現皆成就之以致弘大增進慧益之而廣清淨是為十順清明之

平九

六

法亦無能極以無可得亦無念限其菩薩所
可得者其菩薩所可因起其諸菩薩所應現
行其諸菩薩所當得又其菩薩明徹所至處
又其菩薩所可徹見又彼菩薩慧明所過又
是菩薩法行所知見又其菩薩行應所當
得又其菩薩一切法行慧處皆達之是為十
其住於此大定者無數無限無量無邊際無
盡無稱限無思議無我得之得是為十菩薩
以此定正受入於一一諸行或定或悟而悉
曉知諸定行明達無數諸定亦了具滿諸定

亦曉定之增損又了定諸幻化曉了定所見
行亦知定之由行亦知定之際處亦明曉定
之閑靜亦知定寂寞亦知定念行譬如無熱
龍王池之宮殿有四大河而流出盈溢清澄
無垢無濁無穢清淨無瑕甘美香潔周迴四
出有四目口所從流出一目名和七二目名拔
义三目名蛇味四目名恒其和北流拔义南
流其蛇東流恒水西流一一而迴旋四周亦
如是而充大海而以滿之又彼大河遠之七
帀此河之間有青蓮華紅蓮華白蓮華黃蓮

華以天衆寶之光色精明妙淨展轉而照曜現而鮮潔永無汙穢其間了了曜而明徹葉葉分異現而明顯畫者所不圖像輒動之色既照曜音聲微妙慧善之色圖之難極色力無數天句文普行樂諸葉交錯色發殊妙香美異隸色照曜以無數種種諸寶所校飾衆色無數如日天出於宮殿光而徹照彼諸華之鬱曜相照焜煌能奪日之精光彼諸雜華在河之流而諸水應在河迴轉浮沒乃遊於種種諸華間而此諸華上下低昂妙色煒煒

照曜寶色灼灼日光曲照玄黃乃過日光精如彼衆華之動流河滴聲乃踰天妓樂菩薩大士亦如有四辯才而流出以充滿普智之海如香大河有銀妙色從馬口而出其底皆有銀沙菩薩亦如是清淨之智順隨衆行而從口出依順之義一切諸如來行一切諸義行善施之法諸法慧明分別了竟無罣礙慧而歸智海如和之大河金剛之色從師子口而流出底沙亦金剛色菩薩亦如是出法之光曜有佛金剛之色而自娛樂用照曜於

普世以金剛之慧而自娛樂而充無盡之海
如彼二大河紫磨金色明而光曜亦紫磨金
色之沙菩薩亦如是以發遣之辯而從口出
一切衆生攀慕慧身而悅一切普世以金剛
之慧而有所照曜普度一切常慕順導因緣
使歸於智海半九又若拔义之大河青而瑠璃色
從牛口而出精明流之潔色菩薩亦如是以
無盡明曜辯才而流出以無得之法億那術
百千威猛從念而雨流進至於法河轉充於
普智之海成致諸佛法藏之海如彼河之目

而四面迴旋圍遶歸充大海菩薩亦如是順
迴身行順迴意行身口意迴皆以備具亦如
彼四川之流而歸於海菩薩亦如是以四莊
嚴歸普智海何謂四一者見諸佛而為莊嚴
二者見佛分別慧三者以諸佛法之光曜而
為莊嚴四者攬諸總持而無疑惑是為四復
有四一者以諸度無極而為莊嚴二者以諸
菩薩而為莊嚴行三者以大悲行而為莊嚴
四者於諸衆生滿以法輪之行而為莊嚴是
為四如彼大河迴旋七帀以其四華青紅白

黃而爲莊嚴菩薩亦如是以大乘心於其間
諸未度者而爲說法以興起之其諸定正受
億那術百千而分布之普見佛德以於三世
於諸佛刹清淨行無垢穢如彼無起而靜定
以衆寶樹而圍遶菩薩亦如是以諸刹莊嚴
而爲圍遶得致正覺而現悅樂如彼水潭定
而無動靜然清澄清徹其菩薩亦如是彼菩
薩以道德御心靜然清澄清徹具滿無數諸
德之本如彼無熱池以衆寶爲岸內外而照
徹清淨無垢菩薩亦如是其菩薩心以十寶

慧至億那術百千行致最願慧而普得之曉
了清淨諸德之本如彼之無迴內外清徹底
有紫磨金沙以衆寶而校飾菩薩亦如是得
致徹慧以意無念明菩薩境界以諸菩薩德
行而自莊嚴於諸法而無罣礙一切諸佛行
無處所知一切行明了時節如彼居有諸龍
菩薩亦如是順導一切恐怖之世亦悉顯明
普悉諸等救護極世如彼流水從四日出而
進流歸諸佛德漸舟津流歸至於海菩薩亦
如是以四大慧河流爲諸天梵魔界盡世沙

門梵志極世人類而普津潤之漸舟歸至佛
無上慧海以四種力而自莊嚴何謂為四一
者謂本願之慧普悉救濟一切極世二者向
無斷慧化度一切極世三者具滿諸度無極
之慧使依菩薩之行而順清淨四者明持一
切衆生之本明達諸念使歸無斷之流得至
三世海慧是為四闕除止處謂以菩薩定慧
之行也以無央數諸定為衆寶之莊嚴校飾
觀觀諸佛以無見之慧流歸諸佛之海以大
悲之慧行其行亦有大慈順導一切而無迴

還興起極也以無數權慧而歸十力之海如
彼四河從無熱之淵出而歸無極之大海菩
薩亦如是行上頭之大願具菩薩諸行成得
一切無盡大慧衆行亦無盡常見諸佛以為
娛樂如彼四大河而無迴還歸至於大海而
無毀斷菩薩亦如是菩薩之願而無罣礙得
修具足普賢菩薩行願之光曜得入普智之
行諸法覺道行以無念以無著修如來行如
彼四大河無懈無止處之劫數流歸於海菩
薩亦如是修入普賢菩薩之行於無數劫修

菩薩行而無懈倦以成歸諸如來海歸於無
想行如彼無迴還之大河以衆寶爲明以紫
金沙爲照以銀沙爲晃昱以金沙爲曜灼以
瑠璃沙爲灼灼過日光住照而悉奪日之明
曜明曜至時焰徹過日諸所造作無所煩燒
彼之光曜度之無喻合會衆寶用所成爲其
菩薩亦如是於法身得自由建立於定於其
身一一毛孔以無限量普出諸佛光明而見
諸國土曉入衆會之場而聞法能悉奉持曉
了如來無數身行明達彼諸佛國土見如來

會場聞其法說以無得之得消除億那術劫
有長想又無短念於其身毛數亦無減及諸
土如來衆會場於種種人界不處分別所以
者何以入法界故用解無我微妙故亦不入
於毀行無數定修無數行普現於諸佛所爲
無數諸佛所建爲無數諸佛感動普遠行歸
普賢菩薩所行願以清淨菩薩所行如來十
力而無罣礙修普賢菩薩之行建立具滿曉
達諸感動而無限礙菩薩如是以一時心正
受而覺悟現已極長不墮所入行不著一切

諸行以離於有無之間為一切故現佛土所興耳於法界不見有土處所亦不住限齊亦不住於兩際之間而修入普智之慧樂慕於慧住無自大曉入諸眾生類於諸土而清淨皆以具滿諸土之行種種所想皆悉達知不止生諸想之處而皆悉過於種種色像悉了而無染汙菩薩權慧所具滿至求清淨悉無想念普達諸行地譬如至虛空以離諸趣於諸趣永無所趣菩薩於國土行亦如是了達諸國土修行度眾生永離一切眾思想曉了

一切法界以除一切法想見諸佛而無狀依仰欲觀諸佛解達諸定分別權行一切諸法本清淨而無所著無盡法句慧無量辯才曉了無句無字得諸音聲行了音聲之清淨遠無得法際現種種色彼順導境界一切法本清淨而究竟以大慈於濟度一切眾生之界無因無所因一切界本清淨了所住法界而無所起了諸趣而無所住三場而清淨曉達如來行於種種法而無念種種辯說清淨宣法得致法行是族姓子菩薩大士於法界得

在而尊大

大權慧品第十二

何謂族姓子諸菩薩大士第十最德大定權
 慧行是族姓子諸菩薩有大定名無盡場其
 以此定正受者得住身口意行無盡等住諸
 佛刹亦無盡率九致度衆生行亦無盡十二在導衆生
 之慧而亦無盡放於光明而亦無盡放於明
 網亦無盡現出諸化亦無盡得道轉法輪而
 亦無盡其身能現菩薩現佛於諸國土而亦
 無盡其身悉達諸佛之力其身志願諸佛之

慧顯如佛之興行於諸刹以佛感動佛聲以
 普徹以行佛聖以過佛行其身以過佛之限
 量修治佛事佛行自在是為十最德之定也
 又其菩薩住是定者觀於普智明了普智曉
 解普智以達普智分別普智現於普智以辯
 普智觀於普智以入普智廣顯普智是為十
 又其菩薩亦不願普賢菩薩之行及其大菩
 薩心及大菩薩行及其所現行及所入所現
 大世及其所趣并所建立其大菩薩所潤澤
 其大菩薩亦無斷是為十復有十行一曰無

迴還亦無長養亦無還反亦無疲勞亦不念
不念我亦不放捨亦無動搖亦不斷絕不以
音聲爲菩薩是爲十何則然者如彼菩薩於
諸法致大願而具足於諸行所興大道悉善
修學佛法大海最大等願菩薩之行顯學權

辛九

十三

慧方便之明以善學菩薩幻化善明達一切
音聲而得建立以善建立去來現在及諸佛
一切之世以得大悲之行以諸行而成佛法
之業興發佛法而無罣礙是爲十何則然者
譬如有人得如意寶所念無不建立如其像

而光明其摩尼寶與本無異也菩薩亦如是
得建立如意寶於慧無厭及復明曉普智之
慧於普賢菩薩之行而無懈如其摩尼盡自
現其色像不毀摩尼本體菩薩亦如是致成
普智之像然不毀本行之體所以者何以其
菩薩發義爲一切故欲度一切故而發願修
諸佛行而無迴還欲淨諸佛無懈倦語住一
切故而無懈退於一切無數法無我想念無
却無懈普現一切感動於衆生得清淨而無
厭倦利養普世亦無懈退普照明於世已無

勞退入無數諸法幻間而無迴還心永無却退是謂十譬如紅黃在所虛空無所住止處而所持者不起勞疲亦無損弱亦不得一切意亦無所處亦無繫縛亦無所見亦不處中亦不外觀內無所處不壞本淨所以者何其虛空法本清淨故菩薩亦如是修行廣大無極之願故不起勞疲爲以興發普度衆生故譬如滅度者此爲何人而當滅度於三世而無盡限亦無疲勞亦不恐懼亦無迴還所以者何諸法無二故而歸滅度者何則而勞

耶也菩薩亦如是爲普世衆生而興於世耳當何以而迴還用度衆生故譬如爲普智故也菩薩行亦如是道無有疲亦無勞故過去無住其現在者住佛種種當起所以者何彼無二法故何緣而有勞於諸法如幻而無所入故其無殆菩薩如是故有其身修入普智幸九彼何由而有懈其彼菩薩以是其光明普遍十四至於諸方明曜至諸國土而無罣礙諸色無數種種之藏難得之業無極之寶無得之香無量清淨振動莊嚴大音雷振而普徧以交

露而嚴飾其色甚姝好以琦妙眾寶以為校
 藏以眾寶現嚴淨又各處立綺欄楯其間而
 有眾色如來清淨而為光飾以諸德本外致
 光曜如來吉祥所接逮諸如來所現建立是
 為十等住一蓮華無得無限極於十方十德
 無厭十之清淨菩薩所行所由生普智之明
 所可由生持諸佛法之明除滅普世之火為
 世所禮敬明達普現幻法於極世行有喻無
 喻是謂十又菩薩所坐處足其結加跌滿其
 中蓮華而無空缺悉徧菩薩所坐之處是其

威神所致為諸佛而建於十無得佛刹億那
 術百千如塵之數於一一之毛放諸光明如
 一一之毛孔而亦普然於一一之光明之目
 現十無得佛刹億那術百千如塵之數有摩
 尼寶名曰明顯藏無數異色種種莊飾無數
 德所合寶網所覆眾華交莊而為光顯以住
 最尊之地但以是定而為其行無餘之行行
 無厭足心無放散以一心念作是而行作是
 無懈退作是無恚作是修立作是之行作是
 究竟行所以者何菩薩終無異行菩薩亦無

他行菩薩言行相應所以者何譬如金剛歎其無能壞其金剛體無壞終不失本性菩薩亦如是以此諸法而爲光顯不越斷是法之所住譬如紫磨金歎其焰光而不毀其體之精明菩薩亦如是以精明之法而自明顯不毀修善之行譬如日天子顯以明場不毀光曜菩薩亦如是普明極世不毀菩薩曜德譬如須彌山王以四寶之積美其最高從海而現出菩薩亦如是美其普顯於世其菩薩德本以顯於世而不還離譬如大地美能普持

於世不毀所持之本菩薩亦如是顯以度衆生不離大悲譬如大海美有衆寶不毀海水菩薩亦如是美其諸德之本不離爲衆之重任而度一切譬如便習兵師知刀高下舉刀之輕重便習悉了其形習所入戰而無難於所習亦無誤失用曉了戰慧故菩薩亦是於諸如此像修諸定門之處而興顯之以普智慧而爲光曜譬如遮迦越王至於盡壽命其諸人類而致究竟菩薩亦如是至於修菩薩之行以是像大定正受至致衆生之界

而得究竟之清潔譬如五通自見宿命并他人菩薩亦如是至於興修普賢菩薩之行而致衆生之界亦清淨以其德本譬大雲降雨慧澤而以時節普益於衆生菩薩亦如是至於興法雲普潤以菩薩之德行以此像大定率九正受至於一切衆生究竟清淨十六然致衆敬而永安快而永度無極永然度於普世永然悅於普世永然能斷一切狐疑永然施行福田常求來受明顯受聖永然與菩薩普和同等分數而建立不退之輪永然致慧言莫不受

普爲三世衆生而作依憑永然爲法而致固義普智興興衆生無諍所以者何菩薩修具此諸法爲佛所建開法門界無思無量菩薩諸所言行修慧之善爲普智故爲衆生修善度一切故修土之善以誓願故修法之善建立之故修其無畏無恐怯故修其辯才宣布之故以修於法廣演說故修其總持於法自在故修諸佛座順諸佛故菩薩如是住於此大定於此諸德及餘衆多無得復無得衆德億那術百千而得清淨以此大定之場而顯

威曜承諸威神已之德本與顯以力其慧之地順入以力於諸善友與顯以力一切魔事轉之以力於諸等行諸德之本以其一力於諸誓願固以被鎧力如其種德本興起之力過無盡世以衆福以無降身之力彼以此定十九正受而行有十等像十七去來現在一切諸佛而等像也何謂十一者謂色相衆好以莊嚴身彼菩薩而得等像二者又彼菩薩光明慢網清淨而得等像三者其彼菩薩神足感動諸所化應隨順衆生所應度而示現等像四者

是菩薩無稱限身無量色像一切音聲行應清淨皆而等像五者是彼菩薩建立諸佛土之清淨德隨彼衆生罪福之行順之普現等像六者此彼菩薩隨一切衆生諸所作行以德力攝持以無惑意被服德鎧而現等像七者又彼菩薩以無盡辯才隨諸衆生語言音聲所知色行順轉法輪而現等像八者又彼菩薩無斷無畏極師子吼爲一切衆生說法以梵音聲普悉等像九者又彼菩薩所入句說於三世之積明了神通而亦等像十者又

彼菩薩以佛清淨力如來之境界為衆生而示現等像諸如來是謂十也爾時等目菩薩而謂普賢菩薩若此族姓子其菩薩以此像法而得興俱者而致等像於諸如來豈非為佛豈非為十力豈非為普智豈非於諸法覺而等覺豈非普眼豈非於諸法本際而過慧豈為不信普賢菩薩誓願之行豈非法界盡其所處菩薩所興而審諦時普賢菩薩謂等目曰善哉善哉是族姓子若此如卿所言其菩薩而現等像諸如來豈非佛之謂也如其

族姓子一切菩薩之場去來現在而為誓願為有異發起耶其慧處所而不可得於彼而有起佛耶菩薩所修行而無斷於諸如來彼菩薩而有起耶其力為入諸如來不其十力為彼此耶又其力為念想諸如來不亦無止住普賢菩薩之行彼此而興菩薩如彼諸法界所演說為入邊際而云普智如彼諸法之說種種所入為從外權行耳亦無迴還又彼菩薩之謂如其菩薩諸法之印而知等行若諸法為有覺之覺如彼菩薩於二無二行了

幸九

十八

諸法之權慧入諸法度無極權慧而無迴還
是乃謂菩薩如彼菩薩為普眼之境界曉普
門之慧為從色生耶而謂普眼之言耶如彼
菩薩慧眼境界而曉慧門為從色生耶而謂
普眼如彼菩薩為普眼境界之行意無所行
如心起起而增益而無遠離是乃謂菩薩如
彼菩薩謂法以光曜而明顯若以等地為現
以無礙慧而念念諸佛而謂菩薩如彼菩薩
得致諸如來慧眼可謂諸法致於正覺如其
菩薩致如來正覺慧眼而思觀之而不限量

是謂菩薩如其菩薩行如來行用一切如來
為無二故為過去當來現在諸佛亦無二之
謂如其菩薩修如來神通已自所建行而無
所行是乃謂菩薩如其菩薩得住極世至於
有積乃謂慧之積如其菩薩住於本積除而
分別亦不求其本積亦不忘有妄想於諸法
分別而行此謂菩薩如其菩薩無動不動無
念不念此乃謂興致德本如彼菩薩而具滿
足興造廣大而致清淨亦無迴還於是而無
斷絕是乃普賢菩薩誓願之謂如彼菩薩於

彼法界解了無量以法本無用一相行以謂法無相又彼菩薩於法界住止之謂其妄想菩薩在於流轉如彼菩薩於法界明了無量曉達入於法界諸法各各異相明曉以無相不起疲厭至於數億劫亦不懈退以大悲心悉濟普世順化衆生又是菩薩大士爲普賢菩薩之謂也

悅樂龍王品第十三

譬如族姓子悅樂龍王處於金山之面七寶之藏以七寶而造作周巾亦以七寶以雪而

覆之其悅樂龍王悉白而皎潔如雪之色金色明曜金色畫色莊飾妙帛以覆之垂以交絡覆以衆寶清淨受而覆之垂衆寶爲梳蘇以七體而止立是謂柔之所乘是無穢之色像覩者無厭清淨無瑕調柔性之謂也彼則天帝釋於忉利自在者方適有念金色面出衆寶之藏於彼忽不現而住忉利帝天王之前爾時天帝即乘悅樂龍王天帝釋尋隨上此龍王爾時悅樂龍王於其時爲若干變而種種行現有二十三頭於一一頭各各有七

牙於一一之牙而有七浴池於一一浴池而
現七百蓮華於一一蓮華現有七百玉女如
其一玉女而悉歎歌如天禮義雅同一商而
作音樂帝釋天王於其天堂乘此一象而至
妙樹園悅樂盡歡在意馳遊爾時帝釋天王
於一象上在園觀而戲從悅樂龍而下至衆
寶莊校藏之堂與諸玉女和歌作樂極意歡
喜快相娛樂爾時悅樂龍王現其威神在切
利天盡彼園觀為一象身耳與諸玉女而相
圍遶娛樂歡喜爾時悅樂龍王娛樂已極即

化天身與諸天人皆共交錯而興悅樂龍威
神故被服無異及衆身相色像神煒亦無有
異及其校飾所著衣服諸所一切屈伸坐起
悅樂龍王衆諸所有亦同無異彼諸天人與
悅樂龍王衆諸所有亦同無異如悅樂龍王
所有諸天人亦悉如之如諸天所有悅樂龍
王亦悉如之如切利天人所食器悅樂龍王
復悉如之悅樂龍王亦不現化而有紫金之
像色在於七寶之藏天所化致此衆所有至
切利天而來為帝釋天王供養之故悅像而

供養之天樂而自有以忉利衆所有悉有之
以衆化德而無異如是族姓子菩薩大士以
普賢菩薩之行修立誓願菩薩之定衆寶校
莊以菩薩七體之藏而以趾立從身放諸焰
網明擊法鈴以顯法播普悉化現那羅延身
致最無上誓願為師子步以轉諸慧整以法
綵而住諸藏於諸菩薩為最上行具滿諸行
而致誓願以趣佛樹修行誓願而無斷絕為
欲致普智之慧故致普賢菩薩行願修增廣
大以覺覺之故於菩薩願行而無廻還亦無

懈止又無斷息亦無退轉增益無量之大悲
以大乘願行於一切無身以上普賢之乘行
不捨精進為度當來一切衆生故不斷普賢
菩薩之德行亦不見致道之時道為無得不
得之門無得之得轉法之門無得之得種種
行性之門無得之得種種衆生至諸土處所
感動之門又彼以無得之得普入於諸土現
其生亦悉現普賢之行以無得之得於如來
道樹而致正覺以無得之得為諸菩薩衆圍
遶而行以無得之得至諸種種處所於諸十

方佛土現種種身像尋時致正覺斯須致正覺時間致正覺以日致正覺旬月致正覺歲數無限至於一劫於其時無得之得於此諸數而致正覺觀詣諸如來足下如是比諸土如來而皆稽首敬而禮之供養承事問諸佛事於諸幻場而有增益以清淨心修諸菩薩無量清淨行以無得之得修菩薩慧行以菩薩種種感動種種菩薩處所菩薩種種慧方等菩薩種種之微妙菩薩種種神足無量之意菩薩種種至諸處所菩薩種種遊樂感動

菩薩種種法修其明顯菩薩種種順導之化彼普而亦現菩薩之願行亦不毀其本際其普賢菩薩化一切衆生諸情所有以無得之得修行清淨以斷生死之輪以聲聽聞語而清淨以如來之耳聞諸佛興佛法之音受而行之而皆過於三世而無二諸佛之種皆而念之普智之音聲佛法而以分別於諸處而無處彼以法身而以念之一切菩薩諸行以音聲受之具滿其行普賢之音聲以等覺普智慧處是族姓子當觀普賢之行以無懈斷

率九

廿二

菩薩之行而無斷以智之慧而見諸佛普賢
菩薩之行而無休息而致普智之境界如彼
悅樂龍王莫能動者昇於忉利於彼興起行
至負乘而甚娛樂食天之快樂不失衆諸極
快之養與諸姝女而娛樂悉現衆變與忉利
諸天悉等一類如是族姓子菩薩以普賢之
行無毀大乘之場不捨誓願受諸佛境界以
普智而自樂明了諸佛之行曉解於無數無
數無得而悉清淨於諸土而無住於佛法而
無我亦無想念等諸佛法不起興二明諸佛

土菩薩如是現與諸佛等其去來現在菩薩
之行音聲無斷其悅樂龍為若此處龍境界
復現天上受彼極樂如是族姓子是像大德
之法立志以普賢大士行菩薩無上誓願當
奉勤修淨其內性是謂族姓子第十大定場
廣博明顯無量菩薩之行得其淨性廣其大
乘此族姓子普賢菩薩十定之場也佛說是
普賢菩薩十德大道之定十無上要慧普於
十方諸佛國土皆悉曠明自然感動諸土都
悉率自莊嚴諸土菩薩及諸天人悉作天上

平九

廿三

無量倡樂咸悉歌歎普賢菩薩無量之德明
 照諸土衆冥莫不開闢十方諸地獄諸苦痛
 當爾之時莫不解息十方諸土如塵之數諸
 衆生之類咸悉各各所在皆發無上正真道
 意那術百千之衆皆得無所從生法樂之忍
 佛說是已普賢大士等目菩薩一切菩薩及
 一切衆會天龍鬼神阿須倫人與非人聞佛
 所說莫不歡喜爲佛作禮而退

等目菩薩所問三昧經卷下

音釋

勇悍 悍胡幹切 勇悍也
 欄楯 欄慮干切 欄楯也
 焜煌 焜胡本切 焜煌也
 焜煌 焜胡本切 焜煌也
 也 焜胡本切 焜煌也